

НАРОДНЫ НОВИНКЫ

КУЛЬТУРНО-СПОЛОЧЕНЬСЬКИЙ ТЫЖДЕННИК РУСИНІВ СР

р. XVI

ч. 6-9

28. фебруара 2006
ціна 6,- Ск



• Зо стрічі з родным словом в ОШ у Шаріськім Цавнику: (зверху зліва доправа) писателі М. Мальцовска і Ш. Сухий, директорка школы М. Червенякова, конференсьєры культурного програму школярів І. Малачінова і Р. Білий, участници культурного програму, (долів зліва доправа) позерателі, выступаючі, золотый клинець культурного програму – М. Мачошкова в кругу домашніх співачок, як і учителькы русиньского языка М. Бакова і М. Сакарова.

Стрічі з родным словом продовжують і того року

По минулорічній серії акцій під назвов **Стрічі з родным словом**, котры были в Колбівцях, Міджілабірцях, Руській Порубі, Снині, Пчолинім і Стаціні, главным організатором яких было обчанське здружіння Русин і Народны новинкы, продовжує нова серія тых акцій і в році 2006. Перша з них была в **Основній школі у Шаріськім Цавнику, Свідницького окресу, 23. фебруара** у сполупраці з Методічно-педагогічним центром у Пряшові.

З Пряшова до Цавника рушила пятачленна група, жебы в містній школі взяла участь на **Стрічі з родным словом**, але і на стрічі з школярями, їх учителями і родічами. Гостів із Пряшова уж при авті привітала учителька русиньского языка **Мгр. Марія Бакова**, потім неофіціално директорка школы **Мгр. Марія Червенякова** в своій канцеларні а офіціално перед вшыткыма притомныма во вестібулї школы, де проходив цілий програм стрічі. Также привітала: писателів **Марію Мальцовску** і **Штефана Сухого**, популярну інтерпретаторку русиньских народных співачок **Марію Мачошкову** і акордеоністу **Йозефа Пірога**, як і шефредактора Народных новинок, Русина, одповідного редактора русиньских неперіодічных выдань і учебників – **Александра Зозуляка**. Але перед тым іщі вшыткы собі послушали з почливість якбы другу гімну Русинів – Вручаніє, котрой слова „Я Русин был, есьмь і буду...“ нашого будителя Александра Духновича знать каждый Русин. Но теперь тот гімн пісня прозвучала зо запису в інтерпретаціі найвекшого русиньского аматерського фоклорного колективу на світі (скоро 90-членного) – *Славяне* з америчького Піттсбург, котрой школу навщівив у юни минулого року.

По втупній пісні і привітаню першый ся ку притомным приговорив А. Зозуляк, котрый спершу презентовав выслідкы работы редакції Русин і Народных новинок і неперіодічных русиньских выдань і учебників а потім указав на можности навчана предмету русиньский язык і культура од основної, через середню по високу школу, причім підкреслив, же од академічного року 2006/2007 ся про тых, што ся учили або хотять учіти русиньский язык, теперь ко будут мочи штудувати в 12 розлічных комбінаціях з іншыма предметами бакаларьского штудія. Так істо указав на можности уплатніня ся тых, што ся учать або скінчать штудії русиньского языка, а то в русиньских культурных інштитуціях, як русиньских редакціях писаного слова, в Театрі Александра Духновича в Пряшові, в русиньскім редакцінім тімі Словеньского розгласу, в русиньскім маґазині Словеньской телевізії, в

русиньских культурно-народностных організаціях. Апеловав на притомных, жебы ся не ганьбили за свій материньский русиньский язык і свою русиньску народность, наopak гордили ся нєв. Высловив і радость, же то уж похопили многы родічі, міджі нима і зо Шаріського Цавника і Бенядиковець, котрых діти ходять на години русиньского языка і культуры а выразив і несподіваность, же і шестєро школярів зо словеньского села Радома тьж ся ту учать русиньский язык, але і прекрасны русиньскы співанкы, як сьме мали можность потім учіти в богатім культурнім програмі, котрый під веджінем своїх учительк, главно русиньского языка – **Марії Баковой** і **Монікы Сакаровой**, представили нелем гостям з Пряшова, але і своїм родічам, котры ся їх выступам барз тішыли, што все документовав їх алпазв.

По А. Зозуляку з урывками своїх літературных творів выступили двоє лавреаты престижной Премії Александра Духновича за русиньску літературу – М. Мальцовска (зарівно редакторка Русина і Народных новинок) і Ш. Сухий (зарівно методік русиньского языка і літературы Методічно-педагогічного центра в Пряшові). М. Мальцовска прочітала урывок зо своєї прозы а Ш. Сухий укажкы зо своєї найновшой поезії, котры заинтересовали притомных і пересвідчили їх, же русиньский язык є богатый і мож ним выразити вшыткы думкы і чутя і в літературі.

По выступлінях спомянутых гостів з прекраснім програмом ся представили, самособов, по русиньскы – конференсьєры **Іванка Малачінова** з Радомы і **Растіслав Білий** із Шаріського Цавника, **Зденка Ванькова** з Бенядиковець, котра задекламовала вірш *Я Русинка*, танцюрістки зо семей класы **Никола Яроцакова**, **Катка Іванчова**, **Іванка Малачінова** і **Еріка Гадзімова**, співачкы **Владка Леснякова** і **Штефанія Фечова**, декламаторка **Никола Яроцакова**, співацька група під веджінем учителя музичной выховы **Інж. Яна Маєра**, котрый їх допроваджав гров на акордеоні. Барз миле было выступліня двадцятых діточок з 1. – 4. класы, котрых співанка *Шли козы поза лозы* у публікы выклкала сміх і веселость на твари. Незабытым быв і выступ **Каткы Іванчовой** із віршом *Hurde ne najdete*. Їх выступліня потішыли сердця вшыткых притомных, а нас з Пряшова і тот факт, же зо 65 школярів у ОШ у Шаріськім Цавнику 26 школярів учіть ся у 1. – 4. класі русиньский язык як повинный предмет а 20 школярів з 5. – 9. класы, але лем у формі кружка, што добрі, але, шкода, же не таков формов, як на I. ступні. Интересно, же і шестєро Словаків із Радомы ся тьж учать русиньский язык. Потішыло нас, гостів, котры сьме у школі были уж перед тым, же школа покрасніла внутрі і помалы ся реконструує, выліпшує. Тота робота собі выжадує немалы фінанції, вірїме, же ся їх подарить зогнати новій активній діректорці, котра за рік а пів уж в школі зробила фалаток доброго діла.

Но а доставаме ся на конець Стрічі з родным словом, кідь з великим успіхом выступила співачка **Марька Мачошкова** в доповіді гры на акордеоні **Йожка Пірога**. Што співанка, то векшый алпазв а золотым клинцем было, кідь на самый конець собі заспівала з талантованыма школяркыма, членкыма співацькой группы.

Наісто тот конець, як і ціла акція ся надовго запам'ятать вшыткым участникам. Охходили сьме з нєй з добрым чутєм, же школа ся дає до порядку, же жыє, а то і русиньскым духом, русиньскым словом, хоць того сьме але не чули уж мімо програму, бо школярї ся міджі собов догваряли по словеньскы, што нас кус померзило, бо іщі перед пару роками на ходбах школы учні бісїдовали по русиньскы так, як їх родічі, дідо ці баба. Но але то є процес асіміляції, котрый тьжко заставити, хоць ся о то снажыме і мы, але і учительський колектив у ОШ в Шаріськім Цавнику, вірю?!

А. З. фоткы автора

Умер Ёго Блаженность НИКОЛАЙ

30. януара 2006 року у віці 78 років умер найвышший представитель православной церкви, архієпископ пряшівський, митрополита чеських земель і Словеньска, Ёго Блаженность НИКОЛАЙ (світське мено Коцвар).

Народив ся 19. децембра 1927 року в Ганіювцях, окр. Сабинів. Штудовав у Руській гімназії в Гуменнім, по скінчіню котрой продовжовав на Православній семінарії в Празі. Скінчів Московску духовну академію, де у 1959 році обгаїв кандідатську роботу. О. Николай бив душпастырєм в Микулашовій, Гералтові, бив шпірітуалом Православной богословской факульты в Пряшові, справцєм Пряшівской православной єпархії. В 1965 році в каплічці Православной богословской факульты в Пряшові бив митрополитом празькым і цілого Чеськословеньска о. Доротеєм пострижений за монаха з меном Николай. В тім році бив зволений за пряшівского єпископа. По смерти Ёго Блаженности Доротея ся став митрополитным справцєм Православной церкви в чеських землях і на Словеньску. В 1987 році ся рішїнем Священной синоды Православной церкви в Чеськословеньску стає архієпископом, в чїні якої шыроко репрезентує православну церкву на розлічных офіціалных засіданях з православныма церквыма, але і анґліканьскы і римокатолицькы. По розділіню Чеськословеньска ся стає архієпископом прашівськым і Словеньска.

Час по 1989 році бив позначений одовдаванєм церковного маєтку, храмів, фарьських будов грекокатолицькїй церкви і будованєм новых церковных обєктів, де владыка Николай мав свою заслугу і досяговав успіхы. Понад 80 новых обєктів Православной церкви на Словеньску є того доказом.

14. апріля 2000 року на 10. сеймі православной церкви бив владыка Николай зволений за митрополиту Православной церкви в чеських землях і на Словеньску. 4. юна 2000 року в Катедралнім храмі св. Александра Невского в Пряшові бив інтронізований. За свою заслужну архіпастырську роботу бив владыка Николай нагороджений рядом церковных нагород од руськой, грузиньской і грецькой православной церкви. Православна богословска факулта в Пряшові му приділила титул ТгДр. Honoris causa.

Як найвышший представитель православной церкви в чеських землях і на Словеньску ся снажив о гармонічне і братське наживаня автокефальных церквей, што поважовав за першоряду роль сучасного православія у світі. До послїдніх днів свого жывота зїстав скромным, обыčajным чоловіком, який все нашов слово про своїх вірників, глубоко ся записав до їх сердець, як і своїм архієрейськым діятельством – до історії православной церкви в чеських землях і на Словеньску.

Вічная єму память!

Прот. проф. ТгДр. Мілан ГЕРКА, к. н., таємник Священной синоды

Розлучка з усопшым была за шырокой участи вірників, представителів православной і інших церквей з дому і споза границі, президента Словеньской републікы Івана Ґашпаровіча і председы влады СР Мікулаша Дзурінды 4. фебруара 2006 року в Катедралнім храмі св. Александра Невского в Пряшові. Владыка Николай бив похований в кріпті храму.



Має нову і-мейлову адресу і вебову сторінку

Многы чїтателі і дописователі нам телефонують до редакції, же не можуть нам послати і-мейлом статї, фоткы ці даякы справы. Проблем є в тім, же посылають їх на стару нашу і-мейлову адресу. Але уж дакілко тьжднів має нову і-мейлову адресу, котра є уведжена на послїдній сторінці Народных новинок і часопису Русин, конкретно в тіражі. Але, може, многы то не збачили, зато тепер даваме нашу нову і-мейлову адресу на першу сторінку:

rusyn@stonline.sk.

Так істо нашы новинкы і часопис Русин собі уж од септембра 2005 можете прочітати на новій інтернетовій сторінці: **www.rusynacademy.sk**, а то в рубріці Преса. Тота сторінка мать і ряд інших рубрік, также каждый, хто ся интересує історієв і сучасностєв Русинів на Словеньску, може ся дашто дізнати на тій сторінці, котра мать три верзїї: русиньску, словеньску і анґліцьку. Думаєме, же тот інформація направить холем часточно недорозумліня в послїднім часі.

Редакція

